

Канон пред Елецкой-Харьковской иконой Пресвятой Богородицы

Празднование 6 (19) февраля

Тропарь, глас 6-й

Твоего милосердия дарования воспоминающе, Владычице, и Твой чудотворный образ благоговейно лобызающе, упованием же Твоея помощи сердца наша веселяще, аки среди нас пребывающую Тя помышляем и верою Тебе вопием: Твоего моли Сына и Господа, да научит нас заповеди Его всегда творити и злыя искушения побеждать, и Тебе Предстательницу нашу, достойно пети и славити во веки.

Канон, глас 2-й

Песнь 1

Ирмос: Грядите, людие, поим песнь Христу Богу, раздельшему море и наставльшему люди, яже изведе из работы египетския, яко прославися.

Припев: Пресвятая Богородице, спаси нас.

Радуйся, Богородице Всепетая! восклицаем вернии, на чудотворную Твою икону взирающе, яже радость первее преподобному Антонию Печерскому видением Твоим даровала еси, и поныне подобием видения того, на дщце написанном, всем молящимся радость подаеши, моления их благобно приемлющи.

Пресвятая Богородице, спаси нас.

Антоний преподобный во изгнании неправеднем томясь, видением же Богородицы совершенное приемый утешение, сие на дщце написати повелевает и, во святую Лавру возвращаяся, икону Ея обители Черниговской вручает, яже и до днесь во граде Харькове от всех со благоговением зрится и чудеса исцелений источает.

Слава: Древле злым татаром, на град Чернигов нашедшим, икона Матери Божия чудесне в стене сокрывается и, многим летом прошедшим, паки христианом на поклонение открывается. Зрите убо, о людие, Богоматере великую силу, Ей же не возмогут невернии противостати.

И ныне: Угодника Твоего, Владычице, видением утешила еси, нас же, грешных, не лишь Твоего заступления, аще и недостойни сего являемся: покаяние бо теплое пред святынею Твоею возносяще, аки жена хананейская, неотступно Твоея просим помощи.

Песнь 3

Ирмос: На камени мя веры утвердив, расширил еси уста моя на враги моя, возвесели бо ся дух мой, вегда пети: несть свят, якоже Бог наш, и несть праведен, паче Тебе, Господи.

Пресвятая Богородице, спаси нас.

Инии, Православныя веры врази на пределы Черниговския чрез много лет нашедше, подвигоша воеводу града того икону Елецкую с собою во царствующий град пояти, предану бывшу Черниговскому пределу языку

чуждѣму.

Пресвятая Богородице, спаси нас.

Сия беды, о Владычице, род наш избави, да святыня Твоя во граде Харькове утвердившись, в том непоколеблена пребудет во веки и сердца наша умилением исполняти не престанет.

Слава: Яже в роде воеводы того яко сто лет икона Владычицы пребывши, завещанием внука его в соборную церковь града Харькова поставляется и оттоле молитвы людей Божиих сию, аки крыла Херувимов, присно окружают.

И ныне: Богородице Пречистая, аще и многогрешни суть людие, в Твоей святой храм притекающей, но якоже Сын Твой спасения ради грешник от Небес к нам пришел есть, тако и Ты от Небесных кругов на моления наша призри и прошений людей Твоих не презри, Всепетая.

Господи, помилуй (трижды). Слава, и ныне:

Седален, глас 8-й

Воистинну близ есть Господь сокрушенным сердцем, воистинну смиренныя духом Всеблагий Твой, о Владычице, Сын спасает, понеже аще и единому Антонию угоднику видение Твое явити сподоби, но того подобием и до днесь раби Твои упования на Бога исполняются, и утверждение в Православной вере обретают, и о правде ревностию озаряются.

Песнь 4

Ирмос: Пришел еси от Девы не ходатай, ни Ангел, но Сам, Господи, воплощся, и спасл еси всего мя, человека. Тем зову Ти: слава силе Твоей, Господи.

Пресвятая Богородице, спаси нас.

Людие Божии, милости от Матере Господней приемлющи, души своя похвалами Пречистой насыщают, но насытити не могут, радуйся, Благодатная, паки к Ней взывают и, тако творяще, искушения греховная от себе отгоняют.

Пресвятая Богородице, спаси нас.

Аще и премного укрепися на христианы диавол, овогда убо враги на ня посылай, овогда же обычаи растленные посреде нас рассевай, но мы на Твое заступление, Владычице, уповающе, сего дерзости противлятися не престанем.

Слава: Горе вам, злочестивии, от почитания Матере Божия и от Церкви Христовой отпадшии еретицы, себе бо самех сия радости лишили есте, еже Пречистую Богоматерь прославляти и тем сердца своя умилением исполняти. Покайтесь убо и к нашему лику сопричтитесь.

И ныне: Оле еретиков безумия, от Святого Евангелия научитися не хотящих, како Христос первое чудо милосердия Своего предстательством Матере Своея яви, верныя же научи, да моления своя к Ней несомненною верою возносят.

Песнь 5

Ирмос: Угль Исаии проявлейся, Солнце из девственных утробы возсия во тме заблуждшим, Богоразумия просвещение даруя.

Пресвятая Богородице, спаси нас.

Да утверждается Православная вера умножением исцелений от Твоея чудотворныя иконы, о Владычице, бываемых, да прославляется в людех Твое предстательство, паче же над страстьми победою увенчай наша zde возносимыя Тебе молитвы.

Пресвятая Богородице, спаси нас.

Аще и не вскоре услышана будет молитва ваша, братие, якоже Павла об отступлении сатанина ангела молившагося, но сию долготерпеливно повторяюще, сие восклицайте: О Владычице, грешнаго раба Твоего не возгнушайся, но отпущение грехов мне у Сына Твоего испроси.

Слава: Твоей чудотворней иконе, Пречистая, поклоняясь, и сию благоговейно лобызая, о своих же грехопадениях ужасаяся, сие реку: аще подобает мне их ради скорби приимати, негли терпения дар молитвою Твоею мне ниспосли.

И ныне: На сие убо, о братие, скорбями испытуются души наша, да не гордыне житейстей, ни жестосердию поработимся, но да смиренномудрию преподобнаго Антония подражающе, утешения от Матере Божия, яко радости всех скорбящих да исполнимся.

Песнь 6

Ирмос: Во глубине греховней содержимь есмь, Спасе, и в пучине житейстей обуреваемь, но, якоже Иону от зверя, и мене от страстей возведи и спаси мя.

Пресвятая Богородице, спаси нас.

Аз недостойный ни благим делом, ниже терпению навыков окаянный, увы мне и молитва моя не исправися по достоянию пред Тобою, но Владычице, Твоя милости бездна мое да покрыет неможение и благодатнаго покаяния дар да ниспослет ми.

Пресвятая Богородице, спаси нас.

Языки ангельскими и человеческими аще бы возмог аз глаголати, но и тогда Твоих щедрот множества, праведным и грешным человеком дарованнаго, воспети несть возможно: душам бо и телесем здравие подаеши, Благая, и кающихся милуеши тепле.

Слава: Господи, Господи, се милосердия Твою бездну в том познахом, яко не точною род человеческий от клятвы законныя искупил еси, но и Предстательницу теплую тому даровал еси, Твою Пречистую Матерь, Ей же днесь благодарное приносим поклонение.

И ныне: Оному поклонению да приобщатся языцы, Твоего Сына до днесь не уведевши, или от молитвы, яже к Тебе, отпадши, да всем человеком уверовавшим Твоя ниспосылается благодатная помощь.

Господи, помилуй (*трижды*). Слава, и ныне:

Кондак, глас 5-й

На неувядаемом древе угоднику явившись, Твое же предстательство всем молящимся присно являючи, Владычице, и нашего не отврати смиреннаго моления, но прегрешений наших прощения испроси и, скорби душ наших отъемши, благодарственное наше приими поклонение, да любовь Тя во веки славим, Всепетая.

Икос

Якоже древле видением Пресвятыя Богородицы прият утешение преподобный Антоний и от горькаго изгнания паки во святую Лавру свою радостно вселися, тако и образ Владычицы, сего видения память являяй, от татарскаго пленения волею Ея спасен бысть. Днесь же в великом граде Харькове посреде соборныя церкви водруженный, силу молитв Божия Матере исцелеными многими свидетельствует, к Ней же возопийм: О Всеблагая, изгнанных и скорбящих Заступнице, прошения наша во благих исполни, да любовь Тя во веки славим, Всепетая.

Песнь 7

Ирмос: Да пресла́вное Рождество́ Твое́, Христе́, е́же от Дѣвы прообрази́ши я́ве, неопали́мы в пещи́ о́троки сохрани́л еси́, пѣсньми пою́щия Тебе́: отце́в Бо́же, благословѣн еси́.

Пресвятáя Богородице, спаси́ нас.

Се, при́иде, Влады́чице, время́ Твоего́ о вѣрных заступлѣния, зане́ отвсю́ду от враго́в благоче́стия тесни́ми быва́ют, та́же и от дѣмонских искуше́ний зле обурева́ются, уго́дника же Твоего́ Анто́ния крѣпости не иму́ще, озарѣний свѣше недостойни́ явля́ются. Имиже у́бо ве́си судьба́ми, по́мощь Бо́жию нам испроси́ти потщ́ся.

Пресвятáя Богородице, спаси́ нас.

По́мощи Богороди́цы Пречи́стия, о бра́тие, мно́зи свидѣтелие зде обрета́ются, на́шему же нераде́нию обличителие, тем же чудотворне́й ико́не Влады́чицы предстоя́ще, к пока́янию те́плому устреми́м душ на́ших шѣствие.

Пресвятáя Богородице, спаси́ нас.

Огнь Небе́снаго свѣта объе́млет Тя, Богородице, в видѣнии Анто́нию Печѣ́рскому я́вльшуюся, аз же себѣ огню́ геѣ́нскому грехми́ своїми предугото́вах, но в ско́рби души́ моея́ вопию́ Ти: поми́луй мя, Пречи́стая, и пока́янию те́плому научи́ мя, о мне милосѣ́рдовавши.

Слава: Делом́ благим́ ревни́теля покажи́ мя, Пречи́стая, гнев на стра́сти грехо́вныя вложивши́ в мою́ ду́шу, да ты́я возненави́дев, бли́жняя же сво́я возлюбив́, стезя́м Господ́ним послѣдую́ неукло́нно.

И ны́не: Святосла́в, Черни́гова князь, на ме́сте явлѣ́ния Влады́чицы це́рковь благоле́пную созда́ти потщ́ся и ико́ну Пречи́стия, от преподо́бнаго Анто́ния устроѣ́нную, та́мо поста́ви, ей же во град Ха́рьков днесь пренесе́нной, предстоя́ще мо́лимся, да и нас хра́мы Сы́на Своего́ бы́ти устроит.

Песнь 8

Ирмос: В купинѣ Моисе́ю Дѣвы чу́до на Сина́йстей горе́ Прообрази́вшаго иногда́ по́йте, благослови́те и превозноси́те во вся ве́ки.

Пресвятáя Богородице, спаси́ нас.

Три́е о́троцы, во огни́ неопальны́ пребыва́юще, Богороди́цы прообрази́ша та́инство, я́ко Огнь Божества́ во чре́ве понѣсшей, ны́не же Са́ми во огни́ на зеленѣ́ющем дре́ве свято́му я́вльшися, в долготерпѣ́нии того́ и тем нас утвержда́ет.

Пресвятáя Богородице, спаси́ нас.

Оте́чество на́ше, Влады́чице, па́че всех стран земли́ чудотворными́ ико́нами Твои́ми просвети́ла еси́, я́же, а́ки звѣзды небе́сныя, но́щь земна́го жити́я на́шего освеща́ют и по пу́ти пра́вому ходи́ти нас науча́ют.

Пресвятáя Богородице, спаси́ нас.

Блаже́ни есмь́ вои́стину Предста́тельницу́ Тя, Влады́чице, иму́ще, но вѣ́щшему осужде́нию повинни́ будѣм, а́ще, о то́лицем спасѣ́нии Бо́жием небре́гше, жити́я на́шего испра́вити не потщ́мся.

Слава: Онаго́ на́шея о святы́не сей ра́дости вино́вника, кня́зя Дани́ла Баря́тинскаго, дре́влему же Святосла́ву пра́внука, и́же ико́ну Влады́чицы от де́да приѣ́м, сию́ пред кончи́ною своѣю́ зде хра́му с моли́твою владѣ́, Го́споди, ду́шу упоко́й, нам же пребыва́ние святы́ни сия́ сотвори́ на по́льзу.

И ны́не: Юноши́ в Вавилон́стей пещи́ спасы́й, Го́споди, Ангелом́ во огнь

сошедшим, нас молитвами Матере Твоея от огня страстей свободи, поющих: благословен еси в храме славы Твоея, Господи.

Песнь 9

Ирмос: От земнородных кто слыша таковое или кто виде когда, яко Дева обретется во чреве имущая и безболезненно Младенца породшая? Таковое Твое чудо, и Ты, Чистая Богородице, величаем.

Пресвятая Богородице, спаси нас.

Ангели Твоему, Богородице, заступлению о нас радуются, беси же Твоими молитвами далече от нас отгоняются, аз же еда глух сердцем пребуду, Твоей поклоняйся святыне; сего да не будет, но умилением душа моя да растворится.

Пресвятая Богородице, спаси нас.

Множеству людей, семо притекающему, многия дарования от чудотворных иконы Божия Матере подаются, от них же лучшее есть, еже в чувство покаяния себе привести и на деяния благая устремится. В сем убо помощь Твою яви мне, Пречистая.

Слава: Искупил ны есть Господь наш, Твой же, Богородице, Сын от власти диавола, Твоя же молитва нападения сего врага нашего отгонит, убо и ныне о душах наших предстательствуй, да приближения святыни Твоея достойны явима.

И ныне: Никтоже возможет достойно Матерь Господа нашего прославити, но мы слезами теплыми скудость словес наших воспольним, красотé добродетелей Владычицы нашея дивящися, и тако Сию достойно возвеличим.